

REGLUR

um stjórnskipulag heilbrigðisvísindasviðs Háskólans á Akureyri.

I. KAFLI

Markmið og stefna.

1. gr.

Helstu markmið og stefna.

Meginmarkmið heilbrigðisvísindasviðs Háskólans á Akureyri er að bjóða upp á háskólanám og standa fyrir rannsóknum í heilbrigðisvísindum, þar með talið hjúkrunarfræði, iðjuþjálfunarfræði og öðrum greinum heilbrigðisvísinda. Heilbrigðisvísindasvið vinnur eftir stefnu sem unnin var og mótuð til árána 2012-2017 og er í samræmi við grunnmarkmið heilbrigðisvísindasviðs og stefnu Háskólans á Akureyri hverju sinni.

Heilbrigðisvísindasvið starfar á grundvelli laga um háskóla nr. 63/2006, laga um opinbera háskóla nr. 85/2008 og reglna fyrir Háskólann á Akureyri nr. 387/2009.

II. KAFLI

Skipulagseiningar.

2. gr.

Deildir og brautir fræðasviðsins.

Heilbrigðisvísindasvið skiptist í þrjár deildir; *hjúkrunarfræðideild, iðjuþjálfunarfræðideild og framhaldsnámsdeild í heilbrigðisvísindum.*

Hver deild ber ábyrgð á skipulagi og þróun þess náms sem heilbrigðisvísindasvið hefur samþykkt að fari fram innan deildarinnar. Innan hverrar deildar er boðið upp á minnst eina námslínu eða braut, en með því er átt við skilgreinda samsetningu námskeiða sem nemandinn þarf að ljúka til að hljóta tiltekna gráðu.

Við skipulagningu náms við heilbrigðisvísindasvið er tekið mið af lögum um heilbrigðisstarfsmenn nr. 34/2012, lögum um heilbrigðisþjónustu nr. 40/2007, lögum um réttindi sjúklinga nr. 74/1997 og lögum um sjúkratryggingar nr. 112/2008.

Við skipulagningu náms í hjúkrunarfræði er tekið mið af reglugerð um menntun, réttindi og skyldur hjúkrunarfræðinga og skilyrði til að hljóta starfsleyfi og sérfræðileyfi nr. 512/2013.

Við skipulagningu náms í iðjuþjálfunarfræði er tekið mið af reglugerð um menntun, réttindi og skyldur iðjuþjálfara og skilyrði til að hljóta starfsleyfi nr. 1221/2012.

Við skipulagningu framhaldsnáms í heilbrigðisvísindum er meðal annars tekið mið af því að hver nemandi geti fengið nám sitt metið til sérfræðiviðurkenningar, sjá meðal annars reglugerð um menntun, réttindi og skyldur hjúkrunarfræðinga og skilyrði til að hljóta starfsleyfi og sérfræðileyfi nr. 512/2013, reglugerð um menntun, réttindi og skyldur lækna og skilyrði til að hljóta lækningaleyfi og sérfræðileyfi nr. 1127/2012, reglugerð um menntun, réttindi og skyldur sjúkráþjálfara og skilyrði til að hljóta starfsleyfi og sérfræðileyfi nr. 1127/2012, og reglugerð um menntun, réttindi og skyldur félagsráðgjafa og skilyrði til að hljóta starfsleyfi og sérfræðileyfi nr. 1088/2012.

III. KAFLI

Stjórnskipulag.

3. gr.

Skilgreiningar.

Stundakennari: Kennari sem kennir hluta úr námskeiði eða heilt námskeið en er ekki ráðinn í stöðu aðjúnkt, lektors, dósent eða prófessor við Háskólann á Akureyri.

Kennari með tímabundinn ráðningarsamning: Aðjúnkt eða lektor sem ráðinn er til afmarkaðs tíma, t.d. eins eða tveggja ára. Um getur verið að ræða hlutastarf eða fullt starf.

Fastráðinn kennari: Aðjúnkt, lektor, dósent eða prófessor sem ráðinn er ótímabundið. Um getur verið að ræða hlutastarf eða fullt starf.

Sérfræðingur: Starfsmaður sem ráðinn er til rannsókna og/eða þróunarverkefna, með eða án rannsóknarfrelsis, í krafti sérfræðipekkingar sinnar.

Verkefnastjóri klínísks náms: Starfsmaður sem ráðinn er m.a. til að sjá um niðurröðun nemenda í hjúkrunarfræði í klínískt nám og hefur umsjón með klínískri námsstofu, Þorbjargarstofu, sjá nánari starfslýsingu í „Handbók um klínískt nám í hjúkrunarfræði við heilbrigðisvísindasvið HA“.

4. gr.

Deildafundur heilbrigðisvísindasviðs.

Deildafundur heilbrigðisvísindasviðs fer með æðsta ákvörðunarvald í málefnum fræðasviðs. Hann fjallar um meginatriði í starfsemi heilbrigðisvísindasviðsins og ber ásamt forseta fræðasviðs ábyrgð á að starfsemi sviðsins sé í samræmi við lög og reglur. Deildafundur heilbrigðisvísindasviðs gerir tillögur að ráðningu forseta heilbrigðisvísindasviðs til tveggja ára samkvæmt 15. gr. reglna fyrir Háskólann á Akureyri nr. 387/2009, að undangenginni kosningu um umsækjendur. Á deildafundi skal jafnframt kosinn staðgengill forseta fræðasviðs til tveggja ára sem og varastaðgengill. Nánar er kveðið á um verkefni deildafundar í 16. gr. reglna fyrir Háskólann á Akureyri nr. 387/2009.

Á deildafundi eiga sæti og atkvæðisrétt; forseti fræðasviðs, próffessorar, dósentar, lektorar og aðjúnktar óháð starfshlutfalli og aðrir fastráðnir starfsmenn heilbrigðisvísindasviðs, starfsmenn Heilbrigðisvísindastofnunar Háskólans á Akureyri, sjá reglur um Heilbrigðisvísindastofnun Háskólans á Akureyri nr. 867/2003, einn fulltrúi stundakennara hverrar deildar og einn fulltrúi nemenda hverrar deildar, samkvæmt 16. gr. reglna fyrir Háskólann á Akureyri nr. 387/2009.

5. gr.

Deildaráð heilbrigðisvísindasviðs.

Deildaráð heilbrigðisvísindasviðs starfar samkvæmt 13. og 17. gr. reglna fyrir Háskólann á Akureyri nr. 387/2009. Ráðið fjallar um erindi sem varða mál einstakra nemenda og önnur málefni sem varða heilbrigðisvísindasvið. Deildafundur (sviðsfundur) heilbrigðisvísindasviðs setur nánari reglur um vald og verksvið deildaráðs.

Í deildaráði eiga sæti auk forseta fræðasviðs, staðgengill forseta fræðasviðs, deildaformenn, tveir fulltrúar fastra kennara fræðasviðs og tveir til vara, sem kosnir eru á deildafundi heilbrigðisvísindasviðs til tveggja ára í senn og einn fulltrúi nemenda valinn af félagssamtökum þeirra til eins árs í senn.

6. gr.

Forseti heilbrigðisvísindasviðs, deildaformenn og deildarfundir.

Forseti heilbrigðisvísindasviðs ber ábyrgð á rekstri heilbrigðisvísindasviðs og kennslu á heilbrigðisvísindasviði ásamt deildaformönnum.

Deildaformenn og deildarfundir bera ábyrgð á kennslu, kennslufyrirkomulagi og þróun náms innan hverrar deildar heilbrigðisvísindasviðs. Deildarfundir hverrar deildar gera tillögur til deildaráðs um að auglýsa stöður, fjalla um umsóknir að fengnu dómnefndaráliti og gera tillögur til forseta heilbrigðisvísindasviðs um ráðningar.

Sæti í deild – og þar með seturétt, tillögurétt og atkvæðisrétt á deildarfundum – eiga aðjúnktar, lektorar, dósentar eða próffessorar sem inna af hendi minnst 50% kennsluskyldu sinnar innan deildar, ásamt verkefnastjórum. Þetta ákvæði á ekki við um *framhaldsnámsdeild í heilbrigðisvísindum*.

Deildarformaður skal kosinn af deildarfundum hverrar deildar til tveggja ára í senn úr hópi fastráðinna lektora, dósentar eða próffessora deildarinnar. Kosning deildarformanns skal fara fram eigi síðar en í júní fyrir næstu tvö skólaár. Einnig skal deildarfundur kjósa staðgengil deildarformanns til sama tíma. Einungis deildarfundur getur leyft frávik frá þessum ákvæðum.

Deildarformaður ber ábyrgð á starfsemi deildar, skipulagi, undirbúningi og framkvæmd náms, þróun og samskiptum og tekur einnig þátt í stjórn deildar. Hann sér um samskipti við nemendur, áætlun kennslumagns, gerir tillögur um nýráðningar, velur umsjónarkennara í samráði við forseta heilbrigðisvísindasviðs og kemur að stundaskrárgerð í samvinnu við skrifstofu fræðasviðsins. Deildarformaður stýrir deildarfundum og fylgir samþykktum fundanna eftir. Nánar skal kveðið á um ábyrgð og verkefni deildarformanns í sérstakri starfslýsingu.

7. gr.

Náms- og matsnefndir.

Innan heilbrigðisvísindasviðs skulu náms- og matsnefndir starfa innan hvorrar deildar.

Námsnefnd gerir tillögur til deildarfundar um breytingar á náms- og kennsluskrá. Námsnefndir skulu minnst vera skipaðar þremur fulltrúum fastráðinna kennara sem valdir eru til tveggja ára í senn af viðkomandi deildarfundi og einum fulltrúa nemenda, sem valinn er af félagasamtökum þeirra til eins árs í senn. Deildarformaður er að jafnaði formaður námsnefndar viðkomandi deildar, en að öðru leyti skiptir nefndin sjálf með sér verkum.

Matsnefndir skulu gera tillögur um mat á fyrra námi og fyrirhuguðu skiptinámi nemenda viðkomandi deildar. Matsnefndir skulu minnst vera skipaðar þremur fulltrúum fastráðinna kennara sem valdir eru til tveggja ára í senn af viðkomandi deildarfundi og einum fulltrúa nemenda, sem valinn er af félagasamtökum þeirra til eins árs í senn.

IV. KAFLI

Gildistaka o.fl.

8. gr.

Gildistaka og endurskoðun.

Reglur þessar sem samþykktar voru í háskólaráði 24. júní 2013 eru settar á grundvelli laga nr. 85/2008 um opinbera háskóla og reglna fyrir Háskólann á Akureyri nr. 387/2009 og taka gildi frá og með 1. ágúst 2013. Jafnframt falla úr gildi reglur nr. 610/2009 um stjórnskipulag heilbrigðisvísindasviðs Háskólans á Akureyri.

Reglur þessar skulu endurskoðaðar reglulega með hliðsjón af fenginni reynslu.

Háskólanum á Akureyri, 23. ágúst 2013.

Stefán B. Sigurðsson rektor.

Sigurður Kristinsson,
varaforseti háskólaráðs.